

99er Rotznasä

Därwiler Fasnacht 2018

Sujet: UNICEF – Unsere Nochwuch Isch Cool Es Fägt

S'UNICEF Label für e kinderfründliche Stadt. „Hei sin mir froh“,
Het unseri Gmeind letscht johr mit viel Wirbel übercho,
Es isch e klari Sach gsi het uns d'Jury lo sage,
Denn dr Reto Wolf cha an dr Gemini so schöni Märli vortrage.

S Bundesgericht meint: "I möcht das Interga-Gschichtli nomal höre,
gwüssi Details düen mi stöhre."

Us Hürzi macht me Manu wird uns predigt,
Dr grossi Umbau isch nach kurzer Zit erledigt,
Leider hän sie s'Wichtigste vergässe,
D'Gäst saniere wo drin sin gsässe.

Mitem Baizerwächsel steige au wieder unseri Glüscht,
Jetzt sehn mir hinter dr Bar nämli wieder paar.....schöni Auge.

Ä wohri Gschicht, emotional ganz Gross,
Mir findes wirklich ganz schön, und Famos,
Diä frohi Botschaft verkünde mir mit viel gschrei,
"Därwil, hed ä eigeni Bierbrauerei".

Dr Frei Rolf isch über die Info ganz tuch,
Er het kei Platz me in sim Buch.

S'Wetter macht grossi Kapriole,
Es schneit und schneit ohni Luft z'hole,
2 - 3m Schnee weisch wie schön,
Den sehsch z'Ettigä keine meh vo dene Clön.

Ihres Abzeiche cha leuchte, was für e Hit,
Wenigstens öbis an ihne dänkt mit.

Letschi fahri durchs Dorf, denn seh i zwei schaffe,
Dr Alt isch am räche, dr Neu nur am gaffe,
Das chunt mr jo guet, i has mir jo chöne dänke,
Dr Herr Kleiber isch ä Löllischnägg und chunt us Biel-Benke.


Die Verbindig zu de Schnägge hilft ihm sehr,
Do fallt ihm s Tempo halte nit so schwer.

Katarina, Irma, Irene hän mir rächt zuegsetzt,
Sie hän mir Angscht gmacht und mi sogar verletzt,
Das sin nit mini Exe gsi, wo dänket ihre ahne,
Grosse Sturm git me halt Frauenname.

Männer siget ehrlich, es isch zwar bitter,
Aber jede vo uns kennt die Gwitter.

D'Fatima isch letschi bim Husarzt für e Kontrolle gsi,
Sie het sich frei gmacht ihre Brüder isch au dr bi,
Do meint dr Weidmann i lieg rasch bitz witer unte,
"Bum hets gmacht" Sit dem isch er spurlos verschwunde.

Dr Berset meint: "Dieser Weidmann macht das gut ich muss ihm was schenken,
So können wir die Gesundheitskosten-Prämien senken."



Am Landfescht duet dr Matthis Würscht grilliere,
Und alli Lüt wo wän dörfe cho probiere,
Vom Schwizer Fernseh wird alles überwacht,
Demit dr Künig dä Test nit eleige macht.

Dä Tescht hättet ihr euch chönne spahre,
Wer Würscht seh will cha nach Ettigä fahre.

50 Johr Komitee mir düen jubiliere,
Jedem Einzelne härlisch gratuliere,
Wenn mir in die Gsichter luege, muess die Froog eifach si:
"Sin die Komiteemitglieder scho sit Afang a drbi?"

Mit eurem Batze für die Bänk,
Mache mir im Komitee e Botoxgschänk.

3 Tag im Schwung ganz Därwil duet schunke,
Jä a somene Fescht wird au gern bitz öbis trunke,
As mir sone rächts Bebe mit vertrage isch jo klar,
Mir sin halt alli, im Mühlebodeschuelhus in d Primar.

Am Landfescht isch au gschwunge worde hani ghört,
Guet mir isch das glich gsi, es het mi in dr Bar nit gstört.

Makro jung und sehr charmant,
Mit sinere Lehrerin an dr Hand,
Was alli Franzose duet fasziniere,
Düen mir Schwizer scho im Kindergarte trainiere.

Katalonie wot sich spalte,
Doch Madrid wot sie witer bhalte,
Dr Puigdemont wo dr Rajoy nit mag,
Fahrt nach Belgie für e paar Tag.

D EU Ussepolitik,
Finde mir nit so schigg,
Deshalb gits mir bitzli z'dänke,
Wän mir dene e Milliarde schenke.

D Merkel wo nit witer weiss,
Jä Jamaika isch e scheiss,
Und d'SPD oje oje,
Duet d'Groko wieder seh.

Shot down, d'Freud isch gross,
Doch dä Trumpel dörf glich nach Davos,
Was für'e Wirbel um dä Maa,
Wo de Hei sini Lüt nit zahle cha.

I lueg in d'Schwiz wot mi nüm quäle,
Dört düen mir brav e Tessiner wähle,
Näebi d'AHV versänkt,
Wär hätti dass vo uns dänkt.

Jetzt wo d'Stürreform scho duet fähle,
Müen mir uns no mit dr Billag ume quäle,
Wenn das so witergoht,
Weiss ich nit wo d'Schwiz in dr Zukunft stoht.

An d'Solidarität wänn mir appelliere,
Düen uns nohär e Bierli spendiere,
Mir sage Danke und viel Spass,
Bis später uf dr Gass.